

民國三十八年己丑重修

南湖鄭氏族譜

南湖修譜辦事處編印

本卷目錄

諸祖詩集

自一至三十一頁

異姓名公題詠

自一至五頁

諸祖奏議

自一至十六頁

計共五十二頁

諸祖詩集

九座山徹雲圖

第一 露 公

延綿不可窮寒光徹雲際落石早雷噴濺空春雨細

清明日江南

第四代唐乾甯進士司門郎準 公

吳山楚驛四年中一見清明一改容旅思共風連夜起韶光隨酒着人濃延興門外攀
花別采石江頭帶雨逢無數歸心何日是路遙戈甲正重重

詠 梅

第四代唐中丞兼殿中常侍 良士公

梅花如雪雪如梅雪與梅花有約開信到南枝宜得趣羣芳縮首羨君魁
枝頭點綴報春來玉蕊瓊花不染埃萬紫千紅非我類芳心迢遞雪中開
獨把清標壓衆芳不隨桃李鬪春光橫枝疎影吟窗外月色黃昏度暗香
孤村深處久栽培漏洩南枝暖氣回幾點幽姿清且絕百花頭上占先開
素質悠悠轉自然數枝橫倚小樓前林逋去後誰知己獨占江南霜雪天

寄富洋山禪者

踏破青山路一條走鞭飛蓋去何遙
礙天岩樹春猶冷鎖曉溪雲晝不銷
雪上茗芽因客煮海南沉屑爲齋燒
誰能學得空門士冷却心灰守寂寥

送友人還莆

梅榴花發已端陽蒲柳爭妍夏日長
行館琴書權架閣故園桃李暫思鄉
半帆梅雨山腰翠一棹荷風水面香
莆邑親朋如有問仙溪地僻俗淳良

題夏景

綠樹陰中處士家翠槐夾道筍抽芽
金梭鶯擲庭前柳玉尺魚拋水上花
鼉鼓數時喧古渡龍舟五日駕新槎
蒼頭白髮逢佳景好把香醪泛九霞

曙色

第九代宋三賢賢勅賜
三禮出身虞部尚書部中 舊公

宙幕烟容淡天階曙色明漏殘聲欲住
燭盡淚交橫落葉淒衣冷條風襲骨清
漢嬪三十六夢斷柳宮鶯

秋夕

腐草螢千點晴空雁一行晚蘭紅受露
園韭白凝霜漏箭催銅史站聲續女郎
仙槎乘

月泛去路指銀潢

小園春日

春管始飛灰春花巧剪裁鶯喉因雨滑柳眼向人開
蘭旬風爲主花房蝶作媒月明擁飛蓋誰負魏王才

秋聲

暑氣消殘凜氣多暮陵松竹暗相和棧山悲雨明
皇曲易水吟風楚客歌繚徑陰濃蟬噪柳回塘香散露凝何
桐庭夜夜空明月兩槳歸航漾碧波

桐字疑當作洞

睡覺

玉爐香斷瑞煙微小院陰岑夾幕垂一枕清風人寂後
半窗明月酒醒時漆園蝴蝶難成夢巫峽行雲想有期
徹曙淒涼精氣爽漏殘燈燼畫屏欹

寄友江居

江臯臺閣一重重淡貯生涯水石中春醉花香汀左右
夜吟月色岸西東滴醒睡眠兼葭雨吹散煩襟葦荻風
呂望莫嗟遯遯久文王卜兆已非熊

早春

梅蕊方開破臘枝又聞青帝報春暉閒吟柳院鶯先覺靜掃花庭蝶未歸
瑤草旋教鋪地毯珍藏依舊長山衣禹門趕浪鱗鬣早望雷霆一借威

柳線

柳線輕輕拂漢宮半隨絲雨半隨風未逢巧婦紉縫手已得青皇操捫功
曉刺莎針增荏弱暮和煙縷亂西東千條似引同心帶繫得離人心事同

菊花

萬紅千卉已凋摧獨向籬東破曉開不與羣芳爭豔質特將濃萼作寒媒
萸房泛處香難奪酒罍浮時味更迴願效陶風嘗採餌他年飛步上蓬萊

綠野堂夏景

第十代宋殿中侍御史 伯玉公

雨過黃梅夏將半園亭清灑如山家白鳥窺魚立閑暇紅蜓弄水飛
交加垣衣重重長舊暈萱草節節含新花薤葉簾涼一就枕起來日抱西山斜

綠野堂冬景

第十代知縣 永中公 字育之 號西齋

路出煙村俗駕少江天落莫增寒威依依壺嶠草樹變藹藹海門烟火微日脚下時一雁度風頭起處雙鴉歸却擁殘爐撥灰坐冷笑世途空陰蟻

和王太傅遊國清塘

寒日一觀眺四天雲色希水風迎棹起沙鷺背人飛玉縷鱸新膾金膏蟹正肥斜陽促歸旆那得鱸魚磯

題張許雙忠廟

十一代宋進士知縣叔明公字晦之

西來賊氣欲吞城堅守睢陽抗亂兵臨難節高千古壯報君忠死一毛輕豺狼勢屈江淮靜日月光迴海宇清竹帛輝華遺廟在滿朝奸佞漫偷生

建溪行

水色山光表裏清野花溪柳意相迎狂歌驚鷺灘頭散欹枕看雲榻上生峯曲轉航疑路盡潭深飛棹覺舟輕歸程漸喜鄉關近竹戶楓林雞犬聲

秋夕

暑退歸何處涼生自有期秋容山頂見月色水心知風竹含清韻霜林脫舊枝歲華飛

鳥疾騎省鬢成絲

拜林和靖處士墓

十二代宋會元湘鄉令

厚

公

字景偉
號東溪

山前山後塚纍纍處士孤墳沒草萊古宅更遭新劫火荒林難覓舊栽梅月香水影詩
空好鶴怨猿驚客共哀回首西冷橋外寺晚來金碧擁樓臺

題夾漈草堂并記

十二代宋樞
密院編修

樵

公號西溪

斯堂本幽泉怪石長松修竹榛橡所叢會與時風夜月輕烟浮雲飛禽走獸樵
薪所往來之地溪西遺民於其間爲堂三間覆茅以居焉斯人也其斯之流也
願其人家不富亦不貧不貴達亦無病與爾屬相周旋也

堂後青松百尺長堂前流水日湯湯西窗盡是農岐域北牖無非范葛鄉罷去精神渾
冉冉看來几案尙穰穰不知此物何時了待月臨流自在狂

其二

堂後拖柴堂上燒柴門終日似無聊蓼蟲不解知辛苦松鶴何能慰寂寥述作還驚心
力盡吟哦早覺鬢毛凋布衣蔬食隨天性休訝巢由不見堯

穀城山松隱岩

青障迴環畫屏倚晴窗倒入春湖水村村叢樹綠
蓋列列行人如蟻新秧未插水
田平高低隴麥相縱橫黃昏倦客忘歸去孤月亭亭雲外生

送芹齋

千載清風去不留何人能伴赤松遊乞骸直到骸歸日吾老須臨老盡頭元亮田園何
處有子平婚嫁幾時休湖洲別駕發深省掛却朝冠便自由

題溪東草堂

春融天氣落微微藥草葱芽脈脈肥植竹舊竿從茂謝栽桃新樹忽芳菲天寒堂上燃
柴火日暖溪東解氈衣興動便從山上去人生真性莫教違

湘妃怨

黃埃遊輦轂翳日冷旗旌龍去攀髯遠鸞孤對影微魂沉江縹渺淚染竹依稀枯樹千
載寒松已十圍蘆花深月色燐火劇螢飛橫笛瀟湘暮哀猿何處歸

昭君怨

長謝椒房草終爲薄命身那教蘭蕙質翻與雪霜親
臉膩勺脂淺粧臺促恨顰故知關北夜無分漢南春
紅淚殘胡月輕衣半落塵琵琶淒切語愁殺路傍人

輓通判黃子方

歌成殲露悲秋草正離離昔異修文事今同鬼伯司
盾衰雙日落夷惠兩風遺衰俗吾無恨親曾識紫芝

昭君解

巫山能雨亦能雲宮麗三千杏不聞延壽若爲公道
筆後人誰識一昭君

靈龜潭

泉聲漱石開心孔山色接藍熨眼花着手摩挲溪上
石他年來訪汝爲家

東山採藥

一掬金丹向晚風山前草木盡龍宮詩書便是神仙
味更笑行冲問藥籠

木蘭書屋

十二代宋進士曾耕老公

李穀叔
號友堂

鄭子藏書處柴門碧樹灣開懷溪一曲養拙屋三間
月色斜侵竹鳥聲迴隔山輞川多

勝趣何似此潺湲

宦遊懷歸

十二代宋進士參議東 公字以寅

曾致君王同禹堯幾年事業托清朝倦來世事慵開口老去逢人嬾折腰遊宦時懷京國迴思歸夜逐夢魂搖故園松菊還無恙歲晚寒香喜見招

歸田後作

去去迷途孰問津攜書歲暮到鄉鄰功名向我情無味山水於人興頗真擇地每爲投老計架樓時托苟安身深知陶令休官早自覺歸來媿後塵

送夾漈先生赴召

十三代宋狀元大學士僑 公字愚叔

別墅生涯富古今凝旒夢卜苦追尋一封細札三家布萬卷新書四海心北闕龍吟清晝永東臯猿嘯白雲深滿懷經濟今休靳聞道蒼生渴傅霖

題夾漈草堂

杪秋尋遠山幽懷鬱忡忡草堂跨層崖夕陽山影空高人辭天祿結交杖藜翁遊氛暗九土歲晚余曷從冷冷夾漈水謾謾長松風思之不可見淚落秋雲中

過城南梅庵追憶潮守宋使君叔晦

十四代宋進士推官 玠 公字循道

重過梅庵不記春花殘樹老綠陰成開元宰相腰應折楚國騷人魂尙清古屋參差踈影動小池深淺宿枝橫主人祇在雲深處弄月吟風取次行

題夾漈草堂

十四代左司郎中 寅 公

地阻一區石山高兩漈深弓旌已陳迹泉石尙餘音若不登茲境何以見古心遺編湮沒久思與共推尋

題九鯉湖

十四代應辰公字子應

仙人跨鯉幾經秋三十年來兩度遊削壁千尋凌碧漢鳴濤百折瀉丹邱欲探古洞穿梅入更上危樓爲月留自嘆黃塵催白髮多君載酒共夷猶

送春吟

十七代名儒繼辟不就連 公 字幾夫號牝谷

春光九十滿芳園桃李成蹊自不言登閣飛觴招月魄沿門種柳繫花魂客多北海慚爲主家在南湖舊有村勿嘆春歸何處去青龍青草總春痕

遊九鯉湖

十八代元解元桂 公 字宗湖

湖面澄清鏡不磨倚欄喚起洞仙歌飛湍直下三千尺平石員分數萬窩地狹只容明月少山空偏占白雲多夜寒起坐梅花下身後依稀響珮珂

齋中偶成

十九代貢士訓導 萬里公

原名翼以字行

讀書逾半百漏盡警窗雞祖武仰瞻近家山夕照低一溪灘上下兩岸樹東西課督唯匪懈時吹太乙藜

望峨嵋山有感

十九代貢士梁山太尹 萬井公

原名佃以字行

天邊孤客自黃昏猶幸高山當面存積翠遠生芳草地亂煙曲抱峨嵋村花爲惜別枝沾雨山若含愁臉有痕紫燕翻飛蒼柏上令人悵望北堂萱

壺山歸隱爲宋允聞題

廿一代明進士御史參議雲

公字行從

三秦羈旅十年心故里歸來白髮侵苔徑落花春欲遍柴門流水雨初深耕餘北隴隨孤鶴吟罷南軒撫素琴亦有舊居隣水石他時許我重相尋

題雙節

有傳

傳曰甯城東前埭鄭有節婦二一爲伯霖之配宋氏一爲烈之配林氏宋與林

廿三代明進士刑部主事 抗疏廷諍臨江知府

懋德公

字成昭號雪齋

亦甫城人蓋姑婦也宋氏歸伯霖克持婦道事舅姑惟謹生男名烈甫十歲而伯霖卒年方二十有六矢志靡他仰天號慟恐傷舅姑心時令烈嬉戲以娛其志烈既長娶林氏生男一曰力本纔四歲而烈又卒林年方二十有五全貞保孤猶夫宋也姑痛其子婦哭其夫哀慟隣族有爲之泣下者柏舟自誓先後一心銀山鐵壁增光競彩鄭氏之宗祀不絕如綫以至今日孰非此姑婦之力哉予讀史傳未嘗不嘆節婦之難也東漢桓少君而下十六人唐裴淑英下而四十七人宋三十六人然皆以孝以賢不皆節也世風既頽稱爲士者居常論議多有可觀一遭患難未有不遷次以喪其平生况粉黛笄流乎又况姑婦秉節萃於一門耶今以宋與林觀之執一姓之義以終身抱兩世之孤以存祀卓爾有立嶢然不緇卒昌鄭氏豈非女中之烈丈夫耶予獨怪里胥不以告有司不以聞作史者何所據而書之因表而曰鄭門雙節而顯揚之責尙有望於後人焉紀之以詩

一門雙節古今無何異人間烈丈夫破鏡簾帷秋月皎寒燈機杼夜窗孤百年義氣心

同壯萬古綱常手共扶太史他時應有傳今朝孫子獻觴壺

獄中雙柏庭與提牢御史言懷

時權貴錢甯竊柄公疏其奸數百言忤旨繫獄

院門深銷小亭開滿地殘花點綠苔舊事捐金憐馬骨此時躡屣媿烏臺草沾霜色秋芳減鴉帶寒光暮影來唯有前除雙柏樹蕭蕭風雨漫相催

憶彭城

孤影樓頭雁北征斜陽獨立憶彭城一年風雨燈前淚兩地烟波客裏情遠信幾行還附雁美人何處更聞鶯當時勝會空春夢銀甲新纖悔奏箏

卜居

移居正欲傍竹幽白日蕭條春雨陰門巷敢勞車馬下晤言應識弟兄心海棠花發年芳靜鴉鵲聲殘柳葉深萬里溪山看欲暮漫斟玉薤一長吟

題窗鷄

廿三代貢舉楚府紀善應祚公號東窗

勤苦生平起五更曉雞常候四更鳴近來識得老牛嬾直到天明號兩聲

題流螢

微茫雨夜看流螢上下隨風耿耿星欲得照人無氣力只留一點自家明

三世同朝

嘉靖初公與吾宗抑齋公雪齋公雙石公省齋公棠泉公次山公七俊同朝

二十三代明進士御史光琬公號栗齋

叨逢聖世日恩渥太平年拜舞呼山岳衣冠映後先同朝聯紫極三代樂鈞天勲業期相濟斯圖漫記傳

送姚太僕歸隱

二十三代明進士吏戶左右給事中一鵬公字九萬號抑齋

彭譯去何易藍田願未違披雲開竹徑釣月下魚磯秋水孤舟遠青山倦鳥歸懸知廊廟意北望更依依

遣興

宦遊不得意塵脚此飄蓬日隱龍城霧鐘傳劍浦風感時思洗耳遣興獨書空莫上江樓望羈懷更不窮

送唐生倫省親歸南京應試

嶺嶠瞻雲切星槎泛海回直窮蓬島路獨憶鳳凰臺劍拂台文動波縈藻思開遙知綸閣上應待子雲才

題唐澤毀溪南卷

聞說草玄處溪南景最幽潮聲三島接露氣九峯浮懸榻來徐穉扁舟有子猷何當輞
川野詩社共綢繆

遊烏山次諸老韻

直上芙蓉巔悠然眼界明千村烟火上萬舶海潮輕岩古疎松怪天高獨月清榮期在
何處共爾訂幽盟

過梨嶺書懷

去國非無戀行藏却有猜青山分越嶺白日望金臺排闥肝還赤埋輪志未灰幾封上
殿疏猶入夢中來

題山水圖

野草連三徑風光結四隣雲閒依靜岫梅古辨前村世路塵埃隔幽期泉石親東山堪
獨老不是學逃秦

感懷